

DEO OPTIMO MAX.

UNI ET TRINO.

VIRGINI DEIPARÆ, ET S. LUCÆ

Orthodoxorum Medicorum Patronò.

QUÆSTIO MEDICA,

CARDINALITIIS DISPUTATIONIBUS

manè discutienda, in Scholis Medicorum, die Jovis
octavo mensis Februarii M. DCC. XXXI.

M. FRANCISCO AFFORTY,

Doctore Medico, Antiquorum Facultatis Decanorum
Antiquiore Decano, Præsidente.

An longior jucundiorque vita sobrietatis obligata legibus?

I.



IVERE suave est, diu & jucundè vivere bonorum præstantissimum. Sanitatem fortunæ complementum, miseriei levamen uno ore collaudant omnes & expetunt. Hæc si labefactata titubet, ad Medicum statim trepidi concurrunt, salutiferam illius opem imploraturi; severioris Diætæ præceptis ultrò parent, ingratum medicamentorum saporem linguæ committere non respuunt, proprium sanguinem largâ manu profundi sinunt, scindi, pungi, uri non recusant, partes suas ressecandas porrigunt; sanitatis reparandæ causâ nihil arduum, nihil difficile. At quantò facilius exoptatâ felicitate frui liceret, si vitæ jucunditati malè studendo, vitæ salubritas & longitudo non negligeretur. Sed pro dolor! Vigeat nunc quæ modò languebat sanitas & homo viribus integer rectè valeat, ipsum præsentem sanitatem omni studio conservare crederes? minimè. Deliciarum abreptus lenocinio, pari quo eam absentem prosequeretur ardore, nunc præsentem adversatur. Vitam arguit miseram, quæ Medicinæ legibus astringitur; præterita oblitus incommoda, omnigenis indulget

A



voluptatibus, molliciem & otium infensissimos sanitatis hostes amicè complectitur, nova in dies fercula, nova gulæ malorumque irritamenta, in suam perniciem ingeniosus, excogitat. Verùm si quis rationis sit compos, vitæque diuturnioris simul ac jucundæ paulò cupidior, errores præcipuè circa victum sedulus præcaveat, sobriamque ducat vitam. Ut enim, inter res non naturales, pauca suaviùs afficiunt, magisque delectant, quàm quæ palato blandiuntur, sic pauca sanitati maligniùs insidiantur. Alimenta, in corporis nostri substantiam dum facescunt, si copiâ peccent, quas reficere debent, gravant & obruunt corporis partes: si prævis imbuantur qualitatibus, tenuissimas ipsius quatiunt fibrillas, totiusque ædificii ruinam ab intimis ordiuntur fundamentis.

I I.

LONGA & jucunda est vita, quæ à morbis & doloribus maximè libera, in longum producit tempus. Hujus bonæ valetudinis quasi quædam mater est frugalitas, inimica luxuriosis epulis. Hæc dum sobriis naturæ legibus Stomachi desideria terminat, ærumnas longè arcet; ita ut revera sobrius tam vacet omni morbo, quàm vacat humorum cruditatibus, ingluviei sobole. Verique simile est, rudiore adhuc primis temporibus Medicinâ, inter non multa adversæ valetudinis auxilia, plerumque tamen eam bonam contigisse ob legitimam constitutionem, quam neque desidîa, neque luxuria vitiaverant. Sed ex quò voluptati sunt, quæ necessitate cœperunt alimenta, tam valuit intemperantiæ solertia, ut homo maximè cibo læderetur, quo maximè indiget. Epulis igitur se refecire præceptum ad morbum gradus, & corpora eorum quæ athletarum more repleta sunt, celerrimè & senescunt & ægrotant. Vis rei familiarissimæ periculum avertere? Corpori tantùm indulgeas, quantum bonæ valetudini sat est, & sic edendî bibendique desiderium temperes, ut vigeat Cœctionis integritas. Hæc tibi afferet commoda sobrietas quæ plures jam ad senectutem perduxit, eamque nec turpem, nec citharâ carentem,

I I I.

QUÆ sobria instituitur vivendi ratio, naturæ apprimè consentanea est. Hujus finibus semper coercita frugalitas, alimentis ad vitam utitur, non ad voluptatem. Cibo famem sedat, potu sitim extinguit, faciliq; victu, nec exquisitiori arte corrupto contenta, ventriculum nec copiâ gravat, nec

3
varietate distrahit. Sic vegetior factus princeps ille coctionis opifex, dum cibos amicè complectitur, eos mox strenuè subigit, Utque particulis constant ejusdem ingenii, nec diversæ proprietatis, blando ventriculi calore, placidâ succi Gastrici penetratione colliqueſcunt in succum æquabilem & temperatum, qui spiritui prægnans & vitæ præſidiis munitus, Lacteorum ductus momento subit, naturæ thesauros instauraturus. Frugalitatis leges incertæ pro incertâ hominum indole. Qui valetudinis suæ curam gerit, primæ potissimum Coctioni & Ventriculi viribus attendat oportet, & ex iis colligat prudens quanto quove pascatur alimento. Sanguis, corporis alimenti promptuarium, suam à Chylo recipit temperiem. Qualis hic fuerit, talis futurus ille. Sed ex coctionis facilitate & integritate, velut è fontibus, manat Chyli suavitas, Sanguini dulcem & unctuosam crasim allatura. Hujus beneficio, ceu vivifici roris appulſu, partes animatæ vigent, splendent spiritus, habitus nitescit, lucet in vultu coloris honos, ubique læta jucunditas & firmissimum robur. Diu permanet, ut morbi, sic præmaturi senii nescia valetudo, tandiu retinenda, quandiu amica salutis temperantia, salutis causas retinuerit, Sanguinis dulcedinem, fibrarum molliem.

I V.

UT homini cibis utilissimus simplex, sic alimenta varia nostris aliena corporibus & nocentissima saporum acervatio. Ciborum varietati affinis est & consanguinea morborum parens ingluvies. Hæc, coctioni inimica & ab omni functionum libertate averſa, ubi ventriculum invasit, languent obruta digestionis auxilia, non coquantur cibi, putrescunt; inquinant, non alunt. Satietaſtem brevi cruditas excipit & sordium, morbos omnis generis paritura, congeries. Nec eo tantum nomine invisa est eduliorum diversitas, quod Stomachi robur onere ciborum frangat; tumultu potissimum & saporum dissidio insignis. Nam cum assa elixis, dura mollibus, placidis immittit; conchyliæ turdis immiscent, inter se tam diversa dissideant; haustaque male digerantur necesse est. Interim ex tam male moratis liquoribus particulae plures non mitigatæ dissiliunt in venas, morborum semina sparsuræ. Nec mirum quod inconstans & varius ex tam discordi Chylo Sanguini motus accedat. Taceo improbè quæstas edendi irrationes, peregrinas vires, aliaque jam lassæ voluptatis irritamenta, quibus placet artifice adornare ciborum fercula. Jam non sunt alimenta sed venena, quæ dum mixtionis

lenocinio & voluptatis sapore fastidientem Stomachum sollicitant, plurimum deinceps afferunt detrimenti. His intrâ vasa commissis, circulationis motu acriora quibus constant principia evolvuntur & sæviunt; perent calor blanditiæ, perit mollicies succorum, inducitur alienus ignis Erethismus visceribus inferens, urensque falsâ tabe præcordia leni semper humore irroganda. Sic quæ gustu percipitur voluptas, nî comitem habeat & magistram mediocritatem, causâ fit doloris, quæ secus erat datura lætitiâ & salubrioris vitæ modum.

V.

QUEMADMODUM delicatas dapes prosequi luxuriæ est, sic usu receptas & facile parabiles fugere dementiæ. Veisci tetrîs & contemptissimis cibis turpe censerî debet. Parca sit & simplex, sed nitida cœna. Cûm urget fames, panis in cibo placet; Obsonium si lubet, inferatur, non per artem voluptatemque corruptum, sed Stomacho magis quàm Palato gratum. Cûm sitis urit, aqua de fluvio hausta non sine voluptate bibitur. Qui sapientiores hoc facili victu contenti sunt, illos ne putes suis carere voluptatibus; suas habent & durabiles & quarum non pœniteat: nam vitæ jucunditas non in satietate, sed in sanitate consistit. Non ex mensâ voluptatem captant, sed ex prouidentia, non tam cibo, quàm temperantiâ læti, sua sunt & illis convivia imprimis lauta, quæ primum simplicibus epulis, dein gratâ hilaritate sunt condita. Accumbunt mensæ non tam ventre, quàm animo convivæ; negantque ea esse apponenda pulmentaria, quæ egent altero pulmentario. Cibus ergo convivis apponunt, sed cibos duntaxat, sibi quisque suum affert condimentum, Famem; duplicem percepturus voluptatem, unam ex apparatus facili, alteram quod postridiè, nec capitis gravedinem, nec stomachi cruditatem sentiat. Nec solum nobis, sed & posteris quoque nostris temperanter vivendo consulimus; nam spem vegetæ prolis auget, hominum bona nutrix, sobrietas. Hæc, si gignendis liberis incumbatur, dum generosum fecundumque semen progenerat, dum gelatinosum & laudabile Fœtui suppetit alimentum, pulchrâ & numerosâ prole beatos facit parentes, postquam ipsi sani diutissime vixerint, suis adhuc in liberis diu victuros.

Ergo longior est & jucundior vita sobrietatis obligata legibus.

Autor.

Proponebat Parisiis HYACINTUS THEODORUS BARON, Parisinus, Baccalaur. Med. A.R.S.H. 1731, à sextâ ad meridiem.